

摘藻堂四庫全書薈要

經部

欽定四庫全書蒼要卷八百七十三

經部

毛詩集解卷十三

宋 李樗黃樞 撰

椒聊刺晉昭公也君子見沃之盛彊能修其政知其蕃
行盛大子孫將有晉國焉

椒聊之實蕃衍盈升彼其之子碩大無朋椒聊且遠條
且椒聊之實蕃衍盈匊彼其之子碩大且篤椒聊且遠
條且

李曰沃之盛彊而桓叔又能修其政雖晉人亦將叛

而歸之此君子所以知其子孫必有晉國而滅之也
按左傳桓二年桓叔既與潘父比而滅昭侯莊伯又
於惠之四十五年伐翼弑昭公子孝侯翼人立其弟
鄂侯隱五年莊伯又伐翼鄂侯奔隨王立其子哀侯
桓公二年莊伯子武公又伐翼侯而獲之七年又誘
小子侯殺之王命立其弟緡莊十六年武公遂獲晉
此則桓叔子孫并有晉國之事也君子於桓叔之世
遂逆料其必如此者蓋觀人之國即其微以知其著

而況昭公微弱桓叔彊盛曲沃之并晉國有必然之
理也椒似茱萸而小赤色內有黑子如點今謂之椒
木其木有針刺葉堅而滑澤陸璣疏曰聊語助也王
氏以為薄略之辭則鑿矣椒聊之實蕃衍盈升鄭曰
椒之性芬香而少實今一抔之實繁衍滿升非其常
也蓋爾雅曰椒檛醜棗桃李醜核故鄭氏謂一抔之
實蕃衍盈升然而一抔不可以滿升故孔氏謂若論
一樹則不止一升纔據一實則又不足滿升驗今椒

實一裹之內惟有一實時有二實者少耳今言一掬
滿升假多為喻非實事也故知一掬比一升為小矣
然亦不必泥於一升之說詩人之意椒聊之實始生
蕃衍可以盈升故其久也蕃衍可知但桓叔之彊盛
如此其子孫并有晉國又可知矣蕃衍盈菊本草曰
據古升上徑寸下徑六分深八分則升小於菊然漢
志又謂千二百黍為龠十龠為合十合為升見律歷
志上則升又大於菊故陸農師謂兩手為菊兩菊為

升先曰升後曰菊互相備而已詩人之意止是言曲
沃盛彊如椒之蕃衍而乃區區於升菊小大之不同
亦無益之言也蘇氏曰椒之性芬烈而能奪物者也
今其實蕃衍而盈升則其近之者未有不見奪者也
王氏謂至治馨香能修其政則馨香上達皆不足以
求詩人之意其意但以蕃衍而取喻桓叔初無奪物
之意亦無馨香上達之說彼其之子指桓叔也碩大
無朋鄭曰碩謂壯貌佼好也大謂德美廣博者非也

蓋碩即大也即序所謂盛彊也無朋無比也言其彊
盛而無比也毛曰朋比也釋文曰比為比字必理反
又必二反是又以比為朋比之比故鄭氏以為平均
不朋黨也惟歐以無比當從毛氏之說碩大且篤言
其彊盛又且篤志以修其政也椒聊且遠條且毛氏
曰條長也蓋椒之蕃衍日益遠以喻桓叔之子孫日
彊盛也夫以曲沃之盛彊而能修其政詩人刺昭公
者蓋欲昭公能修其政好禮則民莫敢不敬好義則

民莫敢不順好信則民莫敢不用情則四方之民襁負其子而至矣況於晉國之民乎惟昭公之懦弱無立德不及民而桓叔乃能修其政君子知其將并晉國昭公乃恬然不之知此詩所以譏之也夫天下之勢如持衡首重則尾輕矣昭公能修其政以成其彊盛桓叔安得彊盛乎田氏厚施而得民心晏子之徒皆知齊之為田氏嘗謂景公曰陳氏厚施民歸之矣後世若少惰陳氏而不亡則國其國也已公曰善哉

是可若何對曰唯禮可以已之公曰善哉我不能矣

見昭公十六年

昭公有桓叔之彊盛而不之知齊有田氏之厚施知而不能已知與不知雖不同而所以不能自立則一也此齊之所以為田氏而晉之所以并於曲沃也

黃曰武公獲晉在莊十六年而君子於桓叔之世已逆知其如此者蓋觀人之國者當於其微履霜堅冰至則臣弑其君子弑其父非一朝一夕之故其所由

來者漸矣田氏厚施而得民心晏子謂景公曰田氏
厚施民歸之矣公曰若之何對曰惟禮可以已之曰
善哉吾不能之矣此皆微弱而不能自立之過也晉
之所以為曲沃之所獲亦類是歟

綢繆刺晉亂也國亂則昏姻不得其時焉

綢繆束薪三星在天今夕何夕見此良人子兮子兮如
此良人何綢繆束芻三星在隅今夕何夕見此邂逅子
兮子兮如此邂逅何綢繆束楚三星在戶今夕何夕見

此粲者子兮子兮如此粲者何

李曰綢繆猶纏綿蓋言束薪之狀也毛氏曰男女待禮而後成若薪芻待人事而後束則是以薪喻男女以束之者喻禮也蘇氏曰合異姓以為婚姻言猶錯取衆薪而束之耳薪之為物束之則合釋之則解是以綢繆固之而後可以望其合也蘇氏說與毛氏相似王氏說亦與此不相上下惟鄭謂束薪於野而見天星歐氏以為其義簡而直當從鄭說三星在天曰

參也天文志曰參謂白虎三星故毛氏之意以謂婚姻之月自季秋盡於季春皆可以成婚不待初冬冬末開春之時故陳昏姻之正時以刺之在天謂始見東方也在隅東南隅也在戶謂正月中直戶也始見東方則十月之時在東南隅則十一月十二月正月中直戶則正月之時也月令孟春之月昏參中故知正月中直戶明矣既以在戶為正月則在隅為十一月十二月在天為十月可知鄭曰三星謂心星鄭以仲春

昏而火星不見嫁娶之時也今已見在天非其時爾
故詩人舉其婚姻失時而刺之故曰三星在天然三
星一名大火歐以為參星皆三星則知鄭說為得矣
以其所見之月候嫁娶早晚為有理此言是也若以
三星為心星見失嫁娶之時則下文今夕何夕見此
良人文意相屬也夫仲春之月心星未見至三月四
月則見而在東方左氏曰火出於夏為三月

見昭七

年周官季春出火言三月之時已失其時矣況於在

隅在户乎在隅則四月之末五月之中在户則五月之末六月之中月令曰仲夏之月昏心中是也鄭以三星為心星則可若以心為有尊卑夫婦父子之象則其說鑿矣今夕何夕見此良人張橫渠曰今夕何夕見此良人言此時可以見也子兮子兮如此良人何言國亂不可得見也三星在天已非其時以相謂今三星在天之夕是何月之夕而女子見於良人非其時雖非其時然以國亂不可得見故曰如此良人

何將奈之何哉子兮指娶也毛氏曰良人美室也孔氏曰小戎云厭厭良人蓋妻見此良人言女子之失時也今夕何夕見此粲者言男女之失時也不必如此說見此邂逅王氏曰失時故思不期而會焉則邂逅者不期而會也如此粲者何國語女三為粲大夫一妻二妾故王氏曰亂甚矣雖貴者亦不得以時娶然不當泥於三女之說國語雖曰三女為粲而又曰粲美物也是言美女也凡此皆是上文之意此詩與

衛風有狐鄭風野有蔓草陳風東門之楊皆言世變
多故兵饑喪亂民不安居而力不足故男女婚姻不
得其時也然而陳鄭衛之詩其淫亂為多蓋當時政
教不修禮義不明淫風大行此所以有相奔之俗其
知以淫奔為恥兼又以喪亂之故而不得其時至于
唐風則不然蓋淫佚之禍在於奢侈唐之風俗尚儉
雖不得其時猶未至於淫奔也晉之儉雖不得先王
之中制然猶以尚儉之故愈於奢也孔子曰禮與其

奢也寧儉蓋言儉雖失于中道猶愈於奢也

黃曰衛鄭陳齊之國皆有淫奔之風皆以兵饑喪亂人倫不明故男女有不待禮而相奔者也惟晉魏之國以聖人所都之地雖其習俗儉嗇隘陋而淫奔之俗不聞故綢繆一詩言國亂則婚姻不得其時曰婚姻則是猶有婚姻之禮也聖人之風化其入人深也如此哉

杜

徒細反

杜刺時也君不能親其宗族骨肉離散獨居而

無兄弟將為曲沃所并爾

有杖之杜其葉湑湑

反私叙

獨行踽踽

舉音

豈無他人不如

我同父嗟行之人胡不比焉人無兄弟胡不飲焉

反十利

焉

有杖之杜其葉菁菁獨行叢叢

反求營

豈無他人不如我

同姓嗟行之人胡不比焉人無兄弟胡不飲焉

李曰夫欲人之親我者必有以親之也君不能親其

宗族則骨肉相與離散而不我親矣惟其骨肉離散

此君所以獨居而無兄弟之助既無兄弟此曲沃所

以得肆其吞噬之心也。杖特貌。杜赤棠也。爾雅曰：杜赤棠。郭璞曰：今之杜梨也。樊光曰：赤者為杜，白者為棠。陸璣疏曰：赤棠與白杜同，但子有赤白。美惡子白色為白棠，甘棠也。少酢滑美，赤棠子澀而酢，無味。其葉滑滑。毛氏曰：枝葉相比也。菁菁，毛氏曰：葉盛也。鄭曰：希，少貌。既以滑滑為相比，又以菁菁為葉盛。孔氏以為互相發明。言葉雖茂盛而枝條稀疎，以喻宗族雖強不相親暱也。然按詩云：其葉滑滑，菁菁本

無枝條稀疏之意蘇曰晉君遠其兄弟而親異姓喻如扶杜條榦不足以相扶持與毛鄭不相上下按裳裳者華其葉湑兮毛氏曰湑盛也菁菁者莪毛氏以為盛貌則是二者皆言茂盛不應以湑為枝葉不相比鄭又以為希少故知此當從王氏說曰杜之實不足食而又特生然其葉湑湑然則亦能庇其本根君不能親其宗族骨肉離散曾扶杜之不如也王氏說蓋本于左傳宋昭公欲去羣公子樂豫曰公族公室

之枝葉也葛藟猶能庇其本根故君子以為比況國君乎見文七年王說蓋本於此踽踽毛曰無所親也按孟子何為踽踽涼涼則踽踽然無所親之意也叢叢毛氏曰無所依也說文曰堅固貌骨肉離散君獨行而無所親豈無異姓之臣乎雖有異姓之臣不如我同姓之親也他人謂異姓之人也同父謂同姓之親也同姓謂同祖之人也既有他人而乃曰獨行者王氏曰言既無同父雖有他人猶獨行也此言是也

比輔也。攸助也。同姓之臣既不見親異姓之臣又不肯輔君以相比。故同姓之人曰嗟乎君所與行之人嗟行之人指異姓大夫也。言汝胡不輔君以爲比乎。汝既見君無兄弟之助。汝何不攸助之乎。同姓之臣既不見親異姓之臣。又不見輔。宜乎昭公孤立無助而爲曲沃所并也。棠棣詩兄弟閱于牆外禦其侮。此蓋言兄弟相須于急難之際。同心于急難之中。雖有闕牆之忿。不忘禦侮之事。何者憂患同也。昭公弱而

有曲沃之強曲沃又有吞食晉國之意而昭公不能親其宗族何以禦外侮哉然昭公所以不親宗族者其意謂吾封桓叔非不親也封之曲沃待其盛強稔成其惡莫若與異姓之臣共事也彼豈知周公不以管蔡之故而不封同姓哉同姓之親既已離散異姓之臣又不忠其君此所以為曲沃所并也昔秦始皇振長策以馭宇內吞二周而亡諸侯踐華為城因河為池自以為關中之固子孫帝王萬世之業也然而

懲周之弊以小弱之故罷侯置守而子孫亡尺寸之
封終以孤立雖有至強之勢一夫作難而七廟墮秦
強如此罷侯置守猶足以亡況昭公之微弱而又不
能親其宗族是促其亡也

黃曰古之有國者必封同姓以自衛所謂宗子維城
者周以宗強是也今昭公不親其宗族其心必以為
曲沃之封而反以噬晉故不若與異姓之人共事也
然管蔡雖叛而周人不忘同姓不可以噎而廢食也

秦始皇懲周之弱罷侯置守而子孫孤立一夫作難而七廟墮子孫無尺寸之地亦以骨肉離散故耳可不戒哉

羔裘刺時也晉人刺其在位不恤其民也

羔裘豹祛自我人居居

音據

豈無他人維子之故羔裘豹

裘自我人究究豈無他人維子之好

李曰言晉國之臣既不助其君以愛恤其民此其所以可刺也祛毛氏曰袂也孔氏曰王藻云深衣祛尺

二寸注云袂口也深衣亦云袂之長短反詘之及肘是通袂皆袖之大名祛是袖頭之小稱羔裘豹祛毛氏曰本末不同在位與民異心其說謂晉在位之臣服羔裘豹祛晉人因其服舉以為喻言以羔皮為裘豹皮為祛異皮本末不同以興民欲在上憂已在上乃疾惡其民此皆強生義理毛氏於鄭羔裘檜羔裘皆直說其事未嘗以為興乃於此強為之說何也蘇曰君子處于民上猶豹祛之在羔裘耳豹雖甚貴而

以羔裘為本王氏曰羔裘在位之服也祛在手操執以從事指麾以使人也羔裘而豹祛則其在位操事使人以猛而已非恤其民者也袞祛之末而已羔裘而豹袞則其猛又甚矣蘇氏之說皆有王氏之失惟鄭氏曰羔裘豹祛在位卿大夫之服也其義為簡而直歐陽取之自我人居居毛氏曰自用也居居懷惡不相親比之貌究究猶居居也其說以謂在位者之心既與民異其用使我之民居居然悖惡之色不與

我民相親按爾雅曰居居究究惡也毛說蓋本於此
竊嘗疑爾雅之文是亦詩之詁訓也蓋其書出于漢
世以居究為惡未甚顯然明白王氏曰居居者固而
不知變究究者窮而不能通其說之鑿尤甚于毛氏
張橫渠曰自我人居居自我人而晏安之也自我人
究究言得我民而察察作威皆怨其反不恤已也其
說益迂曲而難曉蘇曰捨羔則豹無所施而無民則
君無所託則是以羔裘為喻其說又非也又謂君甚

尊而由有民以安其居蘇氏說則是而其意未盡謂
在位卿大夫之服者勢雖甚尊必由民以安其居則
其說為得也蘇又曰究久也君之所以能居於此者
由有民也然以究究為久無所據其義殊難曉當闕
之以俟知者豈無他人惟子之故而不去耳子無以
我無所歸而不恤我也鄭謂豈無他人可歸往者乎
我不去者乃念子故舊之人此言是也但所謂此民
卿大夫采邑之民其說非也故歐陽以為曲說惟子

之好爾是念其恩好也此蓋國人將叛而歸沃未嘗
適他國而其心已離也唐人有言曰暑牛之渴豎子
飲之停淖之汚牛渴之久得停淖之汚寧復顧清泠
之水乎設使豎子牽之于清泠之水以滌乎口中之
泥然後知向之所謂停淖之水不可終而飲也今桓
叔將有篡奪之謀民以其修政而欲歸之者蓋以晉
人在位不恤其民民舍桓叔而不歸則將誰歸之哉
正猶飲牛於停淖之汚也齊田氏以私量貸民而以

公量收之民愛之如父母歸之如流水而齊之承嗣
大夫強易其賄日求無藝徵斂無度宮室日更淫亂
不道民人病苦夫婦皆詛此適所以啓其歸田氏之
心也由此觀之齊之大夫強易其賄日求無藝是為
田氏毆民也晉人在位不恤其民是為曲沃毆民也
黃曰羔裘而豹袪者卿大夫之服也卿大夫之勢雖
甚尊必由民以安其居今乃不恤我民如此我民亦
豈無他人乎惟子之故而不忍去耳究久也卿大夫

之所以能久於其位者以有民也噫田氏以私量貸
民而以公量收之齊大夫乃強易其賄徵斂無度故
卒為田氏所有桓叔既修其政而卿大夫乃不恤其
民是為曲沃毆民也

鵠音保羽刺時也昭公之後大亂五世君子下從征役不

得養其父母而作是詩也

肅肅鵠羽集于苞栩況禹反

王事靡盬不能蓺稷黍父母

何怙悠悠蒼天曷其有所肅肅鵠翼集于苞棘王事靡

監不能藝黍稷父母何食悠悠蒼天曷其有極肅肅鵠
行集于苞桑王事靡盬不能藝稻粱父母何嘗悠悠蒼
天曷其有常

李曰鄭氏云五世者昭公孝侯鄂侯哀侯小子侯是
也按左傳小子侯為曲沃伯所殺王立哀侯之弟緡
於晉鄭氏數五世不及緡者孔氏曰按晉國大亂五
世不數緡者言昭公之後則是昭公之時自昭公數
之至小子侯而滿五世故數不及緡也按序曰昭公

之後大亂五世當自孝侯以至於緡也言五世大亂
如此雖君子亦下從征役之事不得耕耨以養其父
母而至於凍餒故作是詩也肅肅鵠羽聲也陸德明
曰鵠羽似鴈而大無後趾性不樹止陳翥所謂連蹄
也樹止則為苦爾雅曰栩杼郭璞曰柞樹也陸曰今
柞櫟也徐州人謂櫟為杼或謂櫟為栩其子為阜或
言阜去其殼為汁可以染阜苞植孫炎曰物叢生為
苞齊人名曰植毛曰行翮也爾雅曰羽謂之翮孔曰

鳥翮之毛有行列故稱行也言鵠之性不樹止而今
乃飛而集于苞栩之上亦猶君子不當使之供賤役
今乃下從征役言非其宜也監毛氏曰不攻綴也孔
曰監與蠱字異義又曰左傳云於文皿蟲為蠱穀之
飛亦為蠱

見昭元年

杜預曰皿器也器受蟲害者為

蠱穀久積則變為飛蟲名曰蠱是蠱為不攻牢不堅
綴之意也王事靡盬謂勤于王事而無不攻綴也藝
樹也言君子既從征役為王家之事雖盡力為之無

不攻綴而孝養之道為王事所奪故不能藝黍稷以
供養其父母何所恃怙乎蓋當農事始興之時而乃
從事於征役不得以時殖穀為一年之計父母亦將
經轉乎溝壑矣故父母何怙何食何嘗悠悠蒼天曷
其有所言君子既下從征役不得奉養父母於是仰
天而愬曰悠悠蒼天何時而得其所而免於征役之
事非是君子憚于王事而欲脫免之也蓋欲養其父
母也曷其有極極已也言何時征役之事已也曷其

有常言何時而得復其常也蓋言君子而從征役之事非其常也屈原曰人窮則反本故勞苦倦極未嘗不呼天疾痛慘怛未嘗不呼父母也此君子之於征役所以呼蒼天而愬之也王氏以謂始曰鵠羽中曰鵠翼卒曰鵠行始曰稷黍中曰黍稷卒曰稻粱始曰何怙中曰何食卒曰何嘗始曰有所中曰有極卒曰有常皆從而為之說以為中甚於始終甚于中其說可謂鑿矣春秋之時晉平公合諸侯以城杞晉悼夫

人食與人之城杞者絳縣老人亦與見襄十三年吳
王夫差伐魯次於泗上魯七百人踊於幕庭有若與
焉見定公八年以絳縣老人之賢與於城杞之役以
有若之賢與于伐吳之役蓋當夫世亂多故征伐不
休賢者蓋有不幸而與於征役也然以賢者而與此
事已非其宜矣而況不得奉養其父母君子當何如
哉古人有言曰枯魚銜索幾何不蠹二親之壽忽若
過隙王氏又曰樹欲靜而風不息子欲養而親不待

此皆孝子之心其愛親也勤思親也篤故汲汲于愛
日以事親惟恐失之故願為人兄不願為人弟其愛
日也如此今以征役之故不特廢其溫清定省之禮
又且無以為卒歲奉養之備其情豈不傷哉此詩如
北山蓼莪陟岵皆孝子不得奉養父母故其詩哀以
思也當征伐之時其心猶不忘苟在父母之側其事
親為何如

黃曰按左傳桓叔既與潘父弑昭公晉人立孝侯惠

四十五年曲沃莊伯伐翼弑孝侯國人立其弟鄂侯
隱五年莊伯又伐翼鄂侯奔隨秋王命虢公伐曲沃
而立哀侯于翼桓公三年莊伯子武公又伐翼逐翼
侯而獲之七年又誘小子侯而殺之王命虢仲立哀
侯之弟緡莊公十六年武公遂獲晉此所謂大亂五
世也竊嘗謂鄭之公子五爭而男女相奔晉之大亂
五世而孝子思念父母此亦帝堯之美風也學者觀
詩當知風俗之所以然

無衣美晉武公也武公始并晉國其大夫為之請命乎
天子之使而作是詩也

豈曰無衣七兮不如子之衣安且吉兮豈曰無衣六兮
不如子之衣安且燠兮

李曰晉昭公封叔父成師於曲沃號為桓叔桓叔生
莊伯莊伯生武公繼世為曲沃之君恃其盛強常有
滅晉之志至莊十六年伐晉而滅之當是時天子之
使適在晉故大夫為之請命于天子之使而天子之

使為之請命於天子左傳曰王使虢公命曲沃武公
以一軍為晉侯因其請命而命之也侯伯七命車旗
衣服以七為節天子之卿六命車旗衣服以六為節
上章言豈曰無衣七兮言我晉國之中豈不能為衣
之七章但不如天子所賜之衣安而且吉也二章言
豈曰無衣六兮蓋不可以必得侯伯之命服得受六
命之服列於天子之卿猶愈于無天子之命也晉本
侯爵故以七言之既而稱其次又以六言之王氏曰

七者侯伯之服也六者子男之服也子男之服以五為節而曰六者天子之卿六命與子男同服故也據周官典命云子男五命其國家宮室車旗衣服禮儀皆以五為節秋官大行人云諸公諸子諸男冕服五章安得以六為子男之服乎鄭氏曰我豈無此七章之衣乎晉舊有之非新命之服晉本侯爵故言舊有七章豈曰無衣七兮詩人之意但是言豈不能造七章之服非以新舊論也豈曰無衣六兮蓋謂我晉國

豈無六命之服言但欲以天子之命而安故爾天子
之使為之請命故曰子者指天子之使言之燠暖也
晉者曲沃之宗國也曲沃至於武公常有篡弑之志
其行篡弑者屢矣至是而又滅之此先王之法所不
容誅然其滅晉又不能請命于天子又不遣大夫以
往乃因天子之使而請就命焉其驕蹇不臣以至於
此如唐室之季強藩悍鎮皆伐其主帥擅自封殖坐
邀天子之旌節劉仁恭嘗謂使者曰旌節吾自有但

要長安本色爾此詩言豈曰無衣不如子之衣安且
吉與劉仁恭之言無以異夫子刪詩乃取之者何哉
王氏曰天下無道小大強弱相攘奪久矣非復知有
王命也武公知請命乎天子之使則所謂彼善于此
此詩所以美之也此之謂與人為善不與人為善而
盡義以絕之則人之為善者將寡矣程氏曰此美其
請命一事不以篡君奪國為羞至於衣服僭侈何難
然其心不安至於請命然後安此意可取此說皆是

也蓋當是時周室衰微諸侯橫恣攘奪攻取惟是恃豈知有天子之命哉惟知有天子之命是猶知有天子也春秋僖公朝於王所成公如京師蓋春秋之時諸侯偃然自肆無有朝王之禮惟僖公朝于王所因天子狩於河陽而遂朝之成公如京師則由會晉伐秦而遂朝之皆非有朝王之誠心使其過王所京師而不朝則無王之心甚矣今也猶能朝之是知有天王也晉武公滅晉雖非諸侯謹度之道使其不請

命於周周亦末如之何矣今也能請于天子之使是知有天子之命也莊子曰人之逃於空谷者聞人足音則蹙然而喜況於兄弟謦欬其側者乎孔子當衰周之時諸侯不修臣職滔滔者天下皆是也魯之僖公成公猶知有朝王之禮晉武公猶知有天子之命聖人安得不與之哉此正所謂聞足音者蹙然而喜者也如氓云婦人望復闕而為淫佚之行其後以夫見棄而始能自悔使其不見棄于夫未必自悔也詩

人猶以反正善之夫子刪詩乃不去之者亦無衣美武公之意也

黃曰臧武仲據防求後孔子曰雖曰不要君吾不信也曲沃以篡弑之逆而有晉國以春秋之法繩之罪不可赦而孔子遽錄其詩而序者亦以為美武公此特美其請命一事耳蓋當時強陵弱衆暴寡諸侯不知有王也久矣晉武公以力雄晉國使其不請命於周周豈能伐之乎今猶能請命于天子之使則是知

有王也齊桓晉文名為尊周而實欲富強其國孔子猶取之者取其彼善于此者也春秋書僖公朝于王所成公如京師皆美之之辭也

有杖之杜刺晉武公也武公寡特兼其宗族而不求賢以自輔焉

有杖之杜生於道左彼君子兮噬肯適我中心好之曷飲食之有杖之杜生于道周彼君子兮噬肯來遊中心好之曷飲食之

李曰兼其宗族者言桓叔晉穆公之子桓叔既封于曲沃則晉國是其宗族也自桓叔以下常有并晉之心晉武公遂滅之是兼其宗族也既兼其宗族則是寡特也又不能求賢以共天位治天職以為股肱耳目之助其寡特可謂甚矣有杖之杜生於道左者道之東也孔氏曰王制云道路男子由左婦人由右在陰為右在陽為左道周者道之曲也此言木之生於道之東與道之曲故行者賴以休息今杜之特生陰

涼寡薄人不得而休息焉猶之武公君子所願以仕
遊而武公寡特此君子所以舍之而去耳王氏乃曰
杜之實不足食也而又特生則其能庇人也寡矣然
尚以生於道左生于道周其去人所往來之道不遠
也君子逮肯適然而來遊然詩人言彼君子兮蓋指
言晉之賢者非謂君子適我而來遊于杜杜之下也
若如王氏之說則休息杜之下人人皆可也何必
獨言君子哉爾雅曰噬逮也言君子之人亦有逮我

國家肯適我者惟君子之中心有好賢之誠何但飲食而已乎苟能求賢以自輔則賢者悅而願仕於朝矣今也武公寡特兼其宗族既如特生之杜又不能舉賢以自輔但飲食之而已賢者豈肯以飲食之故而遲留不去乎周霄問于孟子曰古之君子仕乎傳曰孔子三月無君則皇皇如也出疆必載質又曰晉國亦仕國也未嘗聞仕如此之急也曰古之君子未嘗不欲仕又惡不由其道也惟其未嘗不欲仕至於

出疆必載質此所以噬肯適我也惟其欲仕又惡不
由其道彼雖飲食之而不能用賢者亦將自去之耳
繆公之于子思也亟問亟饋鼎肉使已僕僕爾亟拜
子思不悅曰今而後知君之夫馬畜伋者苟徒飲食
之而不能用則其好之者非出于中心謂之夫馬畜
伋者不亦宜乎張橫渠曰杜喬而少陰味不足嗜雖
有來食者何以願肯適來而就養也噬食也此說是
亦以彼君子兮噬肯適我連上文杜其說與王氏

同如此則中心好之曷飲食之其文不相貫王氏曰
愛之也仁而其敬之也有禮仁而有禮此君子所以
適我而來遊以獲其助也然則武公之見刺必以不
仁也必以無禮也道左者蓋以況仁道周者蓋以況
禮詩言道左道周王氏以謂仁與禮如此則何之而
不可為也其穿鑿至於如此楊龜山攻其說以謂道
周非可以況仁道左非可以況禮使道周道左可以
況仁況禮猶不可以為說況不可乎大雅文王之詩

乃美文王受命作周之詩也其詩曰濟濟多士文王以寧又曰思皇多士生此王國此王國當文王創業垂統以基周室之初刑于寡妻至于兄弟其親戚之間多助如此猶以多士為務䟽附奔奏樂侮先後之人無不備者故傳曰文王猶用衆況吾儕乎今也武公始并晉國正是數求賢人以共濟艱難之時乃兼其宗族而寡特又不能求賢自輔內無親戚之助外無君子之助其勢孤立如此譬如特生之杜固其宜

也武公既并晉國乃兼其宗族遂以為不可用其意
以為我既并國深懼人之謀我亦猶我之謀晉也至
其子獻公患桓叔莊叔之族使士為與羣公子譖富
子而去之既殺游氏之子又圍聚而盡殺羣公子至
驪姬之亂晉無羣公子自是晉無宗族獻公之寡特
如此是亦武公有以遺之也使其無親戚而猶能求
賢可也況不能求賢以自輔國之不亡也幸矣蓋能
親親者必能用賢不能親親未有能求賢者也

黃曰文王刑于寡妻至于兄弟其所以親睦九族者至矣而又有濟濟之多士䟽附先後之人以為之輔助故傳曰文王猶用衆況吾儕乎今武公既併其宗族而無親親之心又不求賢以自輔而無左右之助此詩人所以刺之也其後獻公患桓叔莊叔之族至於盡殺羣公子驪姬之亂晉于是乎無公族是亦武公遺之也嗚呼去手與足尚足以為人乎晉武公自視其奪晉之罪而懼人之如已此即秦之所以亡也

葛生刺晉獻公也好攻戰則國人多喪矣

葛生蒙楚薺

音康

蔓于野予美亡此誰與獨處葛生蒙棘

薺蔓于域予美亡此誰與獨息角枕粲兮錦衾爛兮予
美亡此誰與獨旦夏之日冬之夜百歲之後歸于其居
冬之夜夏之日百歲之後歸于其室

李曰好攻戰國人多喪者按左傳晉獻公魯莊公十
八年立至僖公九年卒在位二十六年傳稱晉伐驪
戎驪戎男女以驪姬閔元年晉侯作二軍以滅耿滅

霍滅魏二年晉侯使太子申生伐東山臯落氏僖二
年晉師滅下陽五年晉侯圍上陽冬滅虢又執虞公
八年里克敗狄于采桑見于左氏傳者如此是其好
攻戰之明驗也惟其好攻戰窮兵黷武雖有克捷之
功未嘗敗衄然其軍旅數起而國人多喪夫從征役
其婦獨處于室故詩人陳其怨恨之辭以刺公也陸
璣曰薺似枯樓葉盛而細其子正黑如燕莫不可食
也其莖葉煮以哺牛除熱渴葛生蒙楚薺蔓于野者

蓋言婦人託于夫猶葛之生蒙于楚蔽之生蔓于野
今也國人多喪其夫既死則婦人無所依託曾葛之
不如也故下文言予美亡此誰與獨處予之所美者
夫也所美之夫既亡將誰與哉獨處而已域者瑩域
也息止也角枕粲兮錦衣爛兮毛曰齋則角枕錦衾
鄭曰夫雖不在不失其祭也攝主主婦猶自齋而行
事也二人之意以謂婦人其夫既不在當必有齋之
事獨齋而行祭當齋之時出夫枕衾以思夫言此角

枕粲然而鮮明錦衾爛然而色美雖有錦衾無人服用其說但據內則所謂夫不在斂枕篋簟席禡器而藏之然禮記所載但言夫不在非必有齋之事亦不當引此說此但其夫不在婦人獨寢因思其夫以及其物物存而人亡思之如此而已予美亡此誰與獨旦鄭曰旦明也我君子無於此吾誰與齊乎獨自潔明王曰以息對旦則知旦者作也以旦對息則知息者夜也其說皆牽強不如程說曰獨處息至旦也夏

之日冬之夜夏至日長晝六十刻夜四十刻冬至夜
長晝四十刻夜六十刻夏之日冬之夜為最長當此
之時思念之情尤切鄭曰極言之以盡情是也居與
室皆墳墓也言生既不得見其夫要之百歲既死之
後則可得見其夫也夫婦之道生則異室死則同穴
故曰歸于其居歸于其室張橫渠曰萬得所託薨不
得所依傷已之不如也據詩言萬生薨蔓之語皆是
言得所託不必如此分別萬生婦人其情可謂切矣

其義可謂高矣始則謂已之託于夫如葛蒙楚蘂蔓
野而乃思其夫不在無以為託而又感角枕之粲錦
衾之爛以致其情既而又以夏之日冬之夜以致其
思造次顛沛未嘗少忘于夫其情可謂切矣末乃言
百歲之後歸于其室其義豈不高乎此正唐國風也
如柏舟詩曰之死矢靡他此詩曰百歲之後歸于其
居亦是無二心也與柏舟詩無以異然柏舟乃美共
姜齊侯之子衛世子之妻誓不再嫁為能守節至於

此婦人居於微陋之中乃能如此可謂難能也

黃曰獻公惟好攻戰則國人多喪故婦人思其夫之切思而不可得則以死自誓可謂義婦矣晉國當兵戈擾攘而孝子貞婦有如鵠羽葛生之詩者帝堯之風化盛矣哉

采苓刺晉獻公也獻公好聽讒焉

采苓采苓首陽之巔人之為言苟亦無信舍旃舍旃苟亦無然人之為言胡得焉采苦采苦首陽之下人之為

言苟亦無與舍旃舍旃苟亦無然人之為言胡得焉采
葑采葑首陽之東人之為言苟亦無從舍旃舍旃苟亦
無然人之為言胡得焉

李曰爾雅曰苓大苦也或以為甘草首陽毛氏云幽
辟之地按首陽在河東蒲坂縣南安得為幽辟首陽
山亦名首山亦名雷首山在河中平樂縣南巔頂也
苦毛氏曰苦菜孔曰此茶也葑亦菜名蕪菁也采苓
首陽之巔毛氏曰采苓細事也首陽幽辟也細事喻

小行幽辟喻無徵也其意以謂獻公多問小行於小
人言語無徵之人故所以讒言興也歐氏破其說謂
首陽名山人所共見而易知者毛氏以為幽辟鄭氏
以為無徵皆踈矣然謂細事喻小行則毛氏之說歐
氏以無徵為鄭氏之說此則誤矣鄭曰采此苓于首
陽山之上首陽山之上信有苓矣然而今之采者未
必於此山然而人必信之興者喻事有似而非王蘇
之說皆如此然王氏則以下文人之為言苟亦無信

舍旃舍旃苟亦無然人之為言胡得焉連上采苓說
按自人之為言以下皆是教獻公止讒之法不當連
上文為說也鄭氏之說長於毛氏不如歐氏之說簡
而明歐曰采苓者積少以成多如讒言積漸以成惑
與采葛義同其首陽蓋興所見也而程氏謂首陽山
生堅實之物以興讒誣之人不實其說陸農師曰讒
人無所不至其害人也皆因其事而譖之也采苓因
人之甘而譖之而采苦因人之苦而譖之葑有時而

甘有時而苦言因人之甘苦而併譖之其穿鑿之甚
以至於此旃鄭氏曰馬也陟岵詩曰尚慎旃哉鄭曰
旃之也左氏曰其將聚而殲旃杜氏亦曰旃之也則
旃字或為之或為焉蓋助語也人之為言苟亦無信
舍旃舍旃苟亦無然鄭氏謂人為善言以稱薦之欲
使見進用也旃之言焉也舍之焉舍之焉謂謗訕人
欲使見貶退也則是以四句分為二事歐氏破其說
謂以文意攷之本是述一事而鄭分為二蓋其下文

再舉人之為言胡得焉則舍旃舍旃者知非二事也
王氏以謂人之造言不可以苟聽亦不可以苟舍此
則王氏之心術也蓋此當從歐程之說以謂戒猷公
以為聞人之言且勿聽信置之且勿以為然更考其
言何所得焉蓋當深察其虛實也歐氏曰夫讒者踈
人之所親疑人之所信奪人之所好非一言可效一
日可為也必須積累而後成或漸入而日深或多言
而並進故曰浸潤之潛又謂積毀銷骨是以詩人刺

讒多以積少成多為患惟其如此使人君不能無懼
則以察其言無有不得其情矣觀獻公好讒以殺太
子申生則知非一言可效一日可為其始也驪姬嬖
欲立奚齊使外嬖梁五與東闕嬖五言于獻公曰宗
邑不可以無主必使太子居曲沃則可以威民而懼
戎讒言始興如此及晉侯作二軍公將上軍太子將
下軍以滅耿滅霍滅魏還為太子城曲沃分之都城
而位以卿其讒言既興如此其後又使太子申生伐

東山臯落氏公衣之偏衣佩之金玦克狄而反此則
讒言又甚矣又告之太子祭于曲沃歸胙於公公田
姬寘諸宮六日公至毒而獻之公祭之地地墳與犬
犬斃與小臣小臣亦斃姬泣曰賊由太子太子奔新
城後縊于新城觀此則讒言之積累也如此詩人喻
之采苓宜矣然姬寘諸宮六日非太子之為明矣為
獻公者苟無以讒為信則其虛實自見矣昔漢蓋主
上官桀與燕王旦通謀詐令人為燕王上書言光專

權自恣疑有非常書奏昭帝曰朕知是書詐也將軍
無罪以未能十日而知昭帝但以日之久近而察其
譖使不以久近而察之則霍光是終有篡君自立之
心使獻公能以日之久近而察之無以讒言而必信則
安有太子之禍邪 黃講同

李迂仲黃實夫毛詩集解卷十三

謹案卷十二第三十頁前三行孟子曰賢者而後
樂此不賢者雖有此不樂也按此係孟子對梁
惠王語今作雪宮之對誤

第三十三頁前五行其後廢太子荼召公子陽生刊
本荼訛榮據左傳改

卷十三第六頁前三行故陳昏姻之正時以刺之
刊本脫姻之二字據孔疏增

第九頁後二行今之杜梨也刊本梨訛黎據爾雅

注改

第十頁後一行葛藟猶能庇其本根刊本本根作
根本據左傳改

第十九頁前七行枯魚銜索刊本銜訛御據韓詩
外傳改


第十九頁前八行樹欲靜而風不息刊本樹沿宋
諱嫌名作木息作停據韓詩外傳改

第三十頁後二行其說但據內則所謂夫不在斂

枕篋簟席褥器而藏之刊本褥訛鞞據禮記改







覆校官助教臣吳省蘭

校對官編修臣朱依魯

謄錄貢生臣郭棣泰

謄錄監生臣郭文焰

欽定四庫全書薈要

經部

毛詩李黃集解卷十五



欽定四庫全書蒼要卷八百七十四

經部

毛詩集解卷十四

宋 李樗黃櫨撰

秦車鄰詁訓傳第十一

鄰美秦仲也秦仲始大有車馬禮樂侍御之好焉

鄰鄰有馬白顛

都田反

未見君子寺人之令

力呈反

阪

音反

有漆隰有栗既見君子並坐鼓瑟今者不樂

音洛

逝者

其耄

田節反

阪有桑隰有楊既見君子並坐鼓簧

音黃

今者

不樂逝者其亡

李曰秦之先伯翳之後其裔非子周孝王時召使養馬於汧渭之間始封為附庸邑於秦谷秦仲非子之曾孫自非子已來其國尚小至秦仲國始大馬王子雍曰秦為附庸世處西戎秦仲修德為宣王大夫遂誅西戎是以始大惟其始大故有車馬禮樂侍御之好也車馬即詩所言有車粼粼有馬白顛禮樂即詩所謂並坐鼓簧侍御即詩所謂寺人之令孔氏謂經先寺人而後鼓瑟序先禮樂而後侍御遂信此而為

之說其說鑿矣鄰鄰衆車之聲也有馬白顛爾雅曰
的顛白顛舍人曰的白也顛額也額有白毛今之戴
星馬也此言車馬之好如此寺人之令又言其侍御
也寺人內小臣閹官或言巷伯君子指秦仲也未見
君子言士之未見秦仲若將見之必先得寺人之官
告于秦仲然後得見其侍御之好如此阪有漆隰有
栗鄭曰喻秦仲之君臣所有各得其宜不如蘇氏之
說蘇氏謂人君之有禮樂猶阪之有漆隰之有栗也

蓋下文言既見君子並坐鼓瑟是言禮樂之盛如此
既見君子並坐鼓瑟今者不樂逝者其耆言士之得
見秦仲秦仲乃與賢者並樂與之宴飲並坐而鼓瑟
且謂之曰今者不與子樂逝者至於老死不復有樂
矣言不可不樂也鄭曰逝者謂去仕他國然逝者與
蟋蟀所謂歲聿其逝論語曰日月逝矣之逝同是皆
言其歲月之往不必為仕他國簫笙竽也

黃曰秦以西戎之國而能有禮樂侍御之好此不足

美也而詩人美之以昔為附庸今為大夫將為諸侯而秦國始大其周將亡之幾乎

駟驥美襄公也始命有田狩之事園囿之樂焉

駟驥孔阜六轡在手公之媚眉翼反子從公于狩奉時辰

牡辰牡孔碩公曰左之舍音捨反拔蒲末反則獲遊于北園四

馬既閑輶車鸞鑣彼驕反載獫馵驕

李曰襄公秦仲之孫自非子已來世為附庸未得王命及周幽王為西犬戎所敗平王東遷洛邑襄公將

兵救周有功平王賜之地始命為諸侯惟其為諸侯
故有田獵之事園囿之樂言其田狩於園囿之中而
有此樂也孔氏曰有藩曰園有牆曰囿則得之矣然
上二章為獵於囿之中下章為調習於園中此則泥
矣說文曰馬深黑色為驪月令孟冬之月駕驪驪注
曰言其馬之色如鐵也阜者肥大也六轡在手孔氏
曰每馬有二轡四馬當八轡矣諸文皆言六轡者以
驂馬內轡納之於轡故在手惟六轡耳四牡孔阜六

轡在手蓋言襄公乘此駟馘之馬馬既阜大又良善
六轡在手而已更不須提控之也公之媚子從公于
狩徐安道曰媚愛也與媚茲一人媚于天子媚于庶
人同媚子者媚賢人也襄公能與賢者從公于狩則
是與賢者同樂也梁惠王立于沼上顧鴻鴈麋鹿曰
賢者亦樂此乎齊宣王見孟子于雪宮曰賢者亦有
此樂乎則是以樂驕賢者今襄公能與賢者同樂亦
可謂賢者矣奉時辰牡辰牡孔碩時是也辰時也周

官獸人冬獻狼夏獻麋春秋獻鹿豕是獸之供各有時也物各有其時所以禽獸各得其所也辰牡孔碩大也惟其辰牡又甚肥大故公曰左之舍拔則獲拔括也矢末也書所謂往省括于度則釋是也公曰左之此蓋虞人驅此辰牡以待公射公謂虞者從左而射之其射之也舍拔則獲此則善射如此上文言公善射矣末章又言公之所以善射御者以習之有素也遊于北園四馬既閑閑習也言遊于北園已習四

種之馬輜車鸞鑣輜車輕車也鄭氏謂輜車驅逆之
車周官田僕掌驅逆之車鄭氏注云驅驅禽使前趨
獲逆御還之使不出圍惟其驅逆之車所以從禽故
惟尚輕也鸞鑣鄭氏置鸞於鑣異于乘車也鄭氏之
意謂乘車則鸞在側輕車則鸞在鑣然按韓詩曰鸞
在衡和在軾蓼蕭之詩曰和鸞雖雖毛注曰在軾曰
和在鑣曰鸞烈祖之詩曰八鸞鏘鏘鄭曰鸞在鑣則
與此言自相違戾徐安道則以鄭說為非載獫狁驕

犬名也長喙曰獫狁短曰歇驕載始也言其始達搏噬之事也王氏乃謂襄公田狩之事園囿之樂於是乎始然此蓋言襄公車馬之所閑習者以其平日遊於北園教之有素也其四馬既閑習又有獫歇驕能達其搏噬此皆北園之所習也故上章既言田狩之事下章乃言平日之閑習亦如定之方中上章既言建國之事下章又言相土地之初王氏謂襄公田狩之事園囿之樂非也此詩與山有樞之詩美刺雖不同

其實同也山有樞之詩以刺昭公是刺詩也此詩以美秦仲是美詩也山有樞之詩大槩以昭公有衣裳車馬鐘鼓而不能自樂也則失其為君之道所以刺之也秦仲始大有車馬禮樂侍御之好襄公有田狩之事園囿之樂如此則可以為君故詩人美之不然則春秋之狩于郎蒐于紅皆一一而譏之而詩人美之果何為邪觀詩者當自默喻矣

黃曰狩于郎蒐于紅春秋皆譏之則田狩之事園囿

之樂何足為美而詩人美之者以襄公救周有功平
王賜之地始命為諸侯時人樂其有功於王室而始
受天子之命則雖田狩之事園囿之樂而人亦樂與
之也晉昭公有車馬而弗馳驅詩人以為刺秦襄公
始命有田狩之事園囿之樂而詩人以為美蓋無愧
於國則國人顧以其所樂而樂之也若畢弋而不修
民事百姓苦之則不足美矣噫文王之囿大矣而人
以為小齊宣之囿小矣而人以為大田獵一事而感

頌喜色之不同民情之所在亦可以想見其君賢否也

小戎美襄公也備其兵甲以討西戎西戎方彊而征伐不休國人則矜其車甲婦人能閔其君子焉

小戎錢淺反

收五檠

音木

梁輶

陟留反

游環脅驅陰鞿

音膚

鍤

沃音沃續文茵暢轂

音谷

駕我騏驎

之庶反

言念君子溫其如玉

在其板屋亂我心曲四牡孔阜六轡在手騏驎

音留

是中

駟古花反

驪是驂龍盾之合鍤以馱

古穴反

輶

音納

言念君子

溫其在邑方何為期胡然我念之伐駟孔羣公

音求

矛鏐

錡

徒對反

蒙伐有苑虎韞

敕亮反

鏐

魯豆反

膺交韞二弓竹閉

緄

古本反

膝

直登反

言念君子載寢載興厭厭良人秩秩德

音

李曰按秦本紀周厲王無道西戎叛之滅犬丘大駱

之族宣王乃以秦仲為大夫誅西戎西戎殺之仲立

二十三年死於戎宣王召其子莊公與兵七千人使

伐西戎破之至幽王寵褒姒廢太子西戎與申侯伐

周殺幽王驪山下而秦襄公將兵救周有功周東遷
洛邑平王封襄公為諸侯賜之岐西之地曰戎為無
道奪我岐豐之地秦能攻逐殺戎即有其地襄十二
年伐戎至岐而卒其子文公十六年伐戎戎敗走於
是文公遂收周餘民有其地至於穆公遂伯西戎秦
居西垂與戎為鄰文公而始敗戎穆公始伯戎則其
襄公世西戎方據周之地而有之此其所以為強盛
也西戎之強若置之而不問則戎狄荐食之心無時

而已將有以討之則連兵動衆無時而休其征伐不休則在行陣者必有暴露之苦處室家者不無怨曠之志如雄雉葛生之詩猶不免于多喪婦人怨曠也今也國人心不以暴露為苦矜其車甲之盛而婦人又無怨曠之志而能閔念其君子此襄公所以為可美也小戎兵車也六月之詩曰元戎十乘以先啓行則先啓行者謂之大戎從後行者謂之小戎收者軫也軫者車之前後兩端之橫木也為此軫者所以

收斂所載故名收焉考工記云輿人參分車廣去一
以為隧注云隧謂車輿深也兵車之隧深四尺四寸
兵車從前軫至後軫惟深四尺四寸車人曰大車牝
服二柯有參分柯之二注曰大車平地載任之車大
車牝服長八尺謂較也大車之軫其深八寸平地載
任之車其軫八尺兵車之軫其深四尺四寸此之謂
淺故曰淺收與下淺駟孔羣同五檠梁輶五五束也
檠歷錄也輶者輶也梁輶輶上勾衡也從軫以前稍

曲而上至衡則居衡之上而向下勾之衡則橫輶下
如屋之梁然故謂之梁輶五檠輶之飾也以皮革五
處而束所束之地因以為文章其文章厯錄然也游
環在服馬背上驂馬之外轡貫之游移前却無定處
也脅驅者驅當服馬脅游環兩驂馬之外轡貫之引
轡為環所束驂馬欲出以此環牽之脅驅以一條皮
上繫于衡後繫于軫當服馬之脅驂馬欲入則以此
皮約之游環所以制驂馬之外出脅驅所以禦驂馬

之內入游環謂之靽環左傳曰如驂之有靳是也陰
靽塗續陰掩軌也軌在軾前軻在輿下三面材以板
木橫側車前所以陰映此軌靽者以皮為之繫之于
陰板之上今驂馬之所引也車衡之長惟六尺六寸
其下只容兩服驂馬之頸不當于衡故分為二靽以
引車也左氏曰兩靽將絕是靽有二蓋驂馬之所引
也塗者銷白金沃灌靽環也續者靽端也文茵暢轂
釋名曰車中所坐也以虎皮為之有文采暢長也轂

衆輻所輳謂之轂考工記曰兵車之輪六尺有六寸
桴其漆內而中誣之以為之轂長注云六尺六寸之
輪漆內六尺四寸是為轂長三尺二寸又車人曰大
車轂長半柯注云大車轂徑尺五寸其大車之轂既
尺五寸兵車之轂三尺二寸比之大車其轂為長故
曰暢轂所謂伐收暢轂皆以兵車比於平地載任之
車則兵車之軫為伐其轂為長駕我騏驎馬之青
黑色說文曰青驪文如博基鼻爾雅曰馬後右足白

曰驤後左足白曰鼻言念君子君子指其夫也古之
君子以玉比德言此婦人念其夫因思其夫之德溫
溫如玉無有玷缺今乃在其板屋之中使我心曲思
之而亂也心曲謂心中委曲之事因思其夫是不得
寧也地理志云天水隴西安定此地山多林木民以
板為屋在其板屋言其夫之討西戎在西戎板屋之
中也四牡孔阜者言兵車所駕四牡之馬甚肥大也
馬既肥大而又良善故執轡在手騏驎是中騶驪是

驂中者中服也言以騏驎為中服以騶驪為外驂也
鄭曰赤身黑鬣曰騏說文赤馬黑毛其言與鄭氏同
爾雅曰馬黑喙騶郭璞曰今之淺黃色毛氏以為黃
馬黑喙為騶亦與此同說文曰馬深黑為驪龍盾之
合盾者以木為之畫龍于其上合而載之言車馬之
事盾則載于車上以為車蔽也蓋以觶軸說文曰觶
環之有舌者蓋一車四馬四馬則八轡詩但言六轡
在手者蓋馬之有轡所以制馬之左右令之隨逐人

意驂馬兩轡則納之於轡言驂馬之欲入則偏於脅
驅而不得入內轡不須牽輓故納驂馬之內轡則繫
於軾前所以輓繫之也鍍以白金飾皮故曰鍍以輓
輓言念君子溫其在邑邑在狄人之邑也方何為期
胡然我念之言欲何時而為歸期乎何為使我思之
至於此極也伐駟孔羣謂薄金夾介馬也左氏曰不
介馬而馳則是戰馬皆被甲以薄金為之清人詩曰
駟介旁旁是也孔羣言甚和也不和則不能羣居矣

韓詩外傳曰駟馬不著甲曰伐駟公矛鍤鍤公三隅
矛也刃有三角故謂之公矛鍤以白金故謂之鍤鍤
禮記曰進戈者前其鍤後其刃進矛戟者前其鍤注
曰鍤底曰鍤取其鍤地平底曰鍤取其鍤地蒙伐有
苑伐中干也亦是盾之類蒙雜羽於其上苑然而有
文也一云蒙伐有苑謂深伐之也苑沙苑在秦之西
境戎舊居也虎韞鏤膺韞弓室也說文曰弓衣也以
虎皮為之說文曰膺胸也爾雅曰金謂之鏤言馬帶

當膺而以金飾之也交韋二弓於韋中顛倒而委置也周禮注曰弓檠曰柶其字從木從必用以竹為之言置弓於韋裏然後以繩約之緼繩也言用滕約以備損壞也凡此皆言車馬之盛以此攻戰豈不克乎言念君子載寢載興厭厭良人秩秩德音厭厭安也秩秩序也良人即君子也婦人謂夫乃安靜善人其德音又秩秩然有序今乃從征役而不反我是以載寢載興未嘗不思念也好逸而惡勞人之常情也今

小戎之君子雖曰有溫溫如王之德其音又秩秩然
乃以西戎猖獗之故從事於矢石之間釋其暇逸之
安而有裹糧坐甲之勞忘其全生之計而有不保首
領之虞非徒不以為勞又且從而矜之非徒行者不
以是為勞而居者亦無怨曠之志以見襄公能使其
民如此孟子嘗曰田獵與民同樂則百姓欣欣然有
喜色而相告不與民同樂則舉疾首蹙頰而相告今
秦民在於征役之間雖夫婦不相見欣欣然有矜誇

之色詩人安得不美之乎據漢書地理志秦迫近戎狄修習戰備高上氣力以射獵為先則好戰者秦之風俗然也秦之風俗如此而襄公又有以使之則安得不矜其車馬之盛然當邊隅未靜夷狄抗衡之時則可以矜其車馬豈可以為常哉襄公既使其民矜其車馬至於孝公又使民勇於公戰怯於私鬪故孫子曰當誘之以厚賞驅之以刑罰使天下之民要利於此非鬪無由也襄公既以是使民孝公又以是使

民自孝公以至始皇所以斥大境土蠶食諸侯以吞
二周亦惟此云故尔善乎蘇東坡有言曰秦民好戰
亦以戰亡夫始皇雖以墮名城殺豪傑銷鋒鏑而民
之好戰之心囂然而未已也是故不可與休息而至
於亡夫為國家者豈可使其風俗有好戰之心哉兵
凶器也戰危事也爭逆德也先王不得已而用之先
王之用兵也蓋能使民懷之而忘其勞也曷嘗使斯
民矜其車甲哉觀周自后稷以農事開國故其民有

愷悌和易之心而其風俗卒歸于忠厚至于大王
季繼之積德累功至於文武亦惟后稷之舊是務觀
國風之詩其言多於耕耨播種之事則可見矣周文
武所以能成周家之治者以其后稷有以遺之也始
皇所以能混一海內者亦秦襄公有以遺之也觀后
稷之稼穡可以知周家卜世卜年之過歷觀襄公之
使民矜車甲則可以知秦之傳祚二世而不及其期
非一朝一夕之故其所由來者有漸矣

黃曰六月元戎十乘以先啓行在先啓行者謂之元戎收者軫也軫者車前後兩端之橫木為此軫者所以收斂所載故號為收平地之車其軫深八尺兵車之軫其深四尺四寸比之為淺故曰淺收梁輶者輶也如屋之梁也故曰梁輶五檠者輶上之飾也五五束也檠歷錄也以皮革五處束之而所束之處文采歷錄然也游環在服馬背上貫驂馬外轡驂馬欲出以此環率之脅驅者服馬之外脅以皮繫于衡轡驂

馬欲入則以此皮約之陰者以板橫側車前及左右以遮蔽車而為之陰映剝則以皮四條為之塗續者陰板之環以白金為之茵以虎皮為之有文者為車中所坐之席暢轂長轂也大車之轂尺五寸兵車之轂三尺有二寸故為長也馬青黑色為騏左足白曰鼻凡此以見車服之盛如此言念君子以下之四句則國之婦人閔念君子之辭四馬八轡兩驂馬有兩內轡皆繫于觶軼在軾以白金為觶以軼轡故謂之

觶軸兩轡繫觶則六轡在手淺駟孔羣者以淺薄之
金為馬甲之用欲其輕易於旋習也刃有三角故謂
之公矛鐔以白金故謂之鍤鐔蒙伐有苑伐中干也
亦是盾之類蒙雜羽于上苑然有文也韞弓衣也以
虎皮為之鏤膺馬胸前飾也以金為之交二弓于韞
中故曰交韞非特有韞又以竹閉祕藏之緄以繩約
之國人矜其車甲之善如此而婦人又閔其君子之
下從征役焉以此觀之則秦之風俗習於攻戰而狃

於干戈非一日也

蒹葭刺襄公也未能用周禮將無以固其國焉

蒹葭蒼蒼白露為霜所謂伊人在水一方遡

音素

洄

音回

從

之道阻且長遡游從之宛在水中央蒹葭淒淒白露未

晞

音希

所謂伊人在水之湄遡洄從之道阻且躋遡游從

之宛在水中坻

宜尸反

蒹葭采采白露未已所謂伊人在

水之涘遡洄從之道阻且右遡游從之宛在水中沚

李曰此詩言襄公受封列於諸侯而乃不能用周禮

秦本夷狄之俗今既為周之諸侯宜以周禮漸漬其民而移其風俗今既不能用周禮此詩所以刺之也禮者為國之本不能用周禮則何以固其國哉說此詩者多迂曲難說當從歐陽氏爾雅曰葭華蒹蘆蒹亂也說文曰蒹者萑之未秀也葭者葦之未秀也又曰雛之初生一曰蒹以此說觀之蒹也萑也蒹也雛也其實一草葭也華也蘆也葦也其實一草也蒹者萑之未秀者葭者葦之未秀者至于秋堅成然後謂

之萑葦蒼蒼盛也歐陽曰蒹葭水草蒼蒼然茂盛必
待霜降以成其質然後堅實而可用以此比秦雖強
盛必用周禮以變其夷狄之俗然後可以列于諸侯
此言是也鄭氏以蒼為強喻衆民之不從襄公政令
按詩蒹葭蒼蒼但言水草之盛如秦民之強也白露
為霜凝而為霜此其喻禮爾而王氏乃曰仁露義霜
也而禮節斯二者襄公為國而不能用禮將無以成
物故刺之曰蒹葭蒼蒼白露為霜其說固已迂矣而

又謂降而為水升而為露凝而為霜其本一也其升也降也凝也有度數存焉謂之時此天道也畜而為德散而為仁斂而為義其本一也其畜也斂也散也有度數存焉謂之禮此人道也其言破碎一至于楊龜山已辨之矣更不復云毛曰淒淒猶蒼蒼也采采毛氏曰猶淒淒也白露未晞言露未乾而為霜也未已則未至于晞矣故詩人刺襄公能用周禮則可以固國如蒹葭然露降而為霜則可用未已未晞則

不可用矣王氏以淒淒為成材故于淒淒曰未晞於
采采曰未已言成物之易而速有如此者此皆鑿說
也逆流而上曰溯洄順流而下曰溯游水草交曰湄
躋升也小渚曰汙小汙曰坻渙者涯也右者出其右
言迂迴也孔氏曰出其左亦迂迴言右者取其與渙
汙為韻爾歐陽謂伊人者斥襄公也謂彼襄公如水
旁之人不知所適欲逆流而上則道遠而不能達欲
順流而下則不免困于水中以興襄公雖得列于諸

侯而不知所為欲慕中國之禮義既邈不能及退循其舊則又不免為夷狄也此說是也鄭氏乃以伊人為知周禮之賢人乃在大水之一邊蓋言其遠也欲求而用之按詩人之意但言不能用周禮今又言不能用賢人本無此意是又畫蛇添足王氏之說尤為苛細暗昧為難通歐陽之說為勝當從之也齊桓公問於仲孫湫曰魯可取乎對曰不可猶秉周禮周禮所以本也臣聞之國將亡本必先顛而後枝葉從之

魯不棄周禮未可動也見閔元年則知周禮所繫豈輕也哉故曰禮之可以為國也久矣與天地並未有舍禮而能固其國者亦未有用禮而國不固者秦本夷狄之俗自襄公以前未受封於周而列為諸侯雖未用周禮猶可也人亦不以不用周禮責之也今也列爵封土為周之諸侯所以保其社稷而撫其人民者豈可無禮乎襄公既不能用禮故詩人慮其無以固其國而刺之也襄公既使其民矜其車甲但有好

戰之心使能用周禮以固其國猶可以漸進也既不能
用周禮則何以為國之本乎譬之耽於酒色之淫而恣
無厭之欲乃能用藥石以助之雖非養生之道猶尚可
也既耽於酒色之淫又無藥石之助則强悍盛壯未有不
亡者也秦能使民有好戰之心又不能
用禮以固其國雖強盛之勢不已至始皇有天下亦
無救于亡也周自后稷至于文武所歷者數百年而
其務農之政猶一日也雖皆以是得天下而其成效

則霄壤之不同故秦之有天下不過為漢驅民而已
於秦何有哉

黃曰蘇子由古史論曰秦起于西垂與夷狄雜居本
以強兵富國為先襄公以耕戰自力而不知以禮義
成之豈不蒼然盛哉然君子以為未成故其後世狙
於利而不知義至商君厲之以法風俗日惡鄙詐暴
慢甚於六國卒以此勝天下既勝之後二世而亡其
亦有以取之矣歐陽公本義曰襄公以命為諸侯受

顯服而不能用周禮變其夷狄之俗故詩人刺之以
謂蒹葭水草蒼然而茂盛必待霜降以成其質然後
堅實而可用以比秦雖強盛必用周禮以變其俗然
後可列于諸侯伊人者斥襄公也謂彼襄公如水旁
之人不知所適欲逆流而上則道遠不能達欲順流
而下則不免困于水中以喻襄公雖得列于諸侯而
不知其所當為欲慕中國之禮義既邈而不能及退
循其舊則又不免為夷狄也夫禮者所以維持而安

全之道雖無不可較之形而有不可較之實使人君而知有禮焉則截然有不可犯者齊桓公嘗問於仲孫湫曰魯可取乎對曰不可猶秉周禮周禮所以本也臣聞之國將亡本必先顛而後枝葉從之魯不棄周禮未可動也然則不棄周禮所以存魯未能用周禮所以亡秦也歟

終南戒襄公也能取周地始為諸侯受顯服大夫美之故作是詩以戒勸之

終南何有有條有梅君子至止錦衣狐裘顏如渥

於角反

丹其君也哉終南何有有紀有堂君子至止黻

音弗

衣繡

裳佩玉將將

七羊反

壽考不忘

李曰按秦本紀自西戎侵奪岐豐之地周遂東遷雖使秦取岐豐之地而終襄公之世不能取之但十二年伐戎至岐而卒其子文公于是伐戎取其地此詩序所言襄公能取周地是說與史記相戾從史記則此序之言為可廢從此序則史記之言為妄當闕之

以俟知者故鄭氏因此序謂秦處周之舊土歐陽以
此破之至於始為諸侯其言與史記合矣襄公秦君
也君能却西戎之鋒敵王所愾使周室得以東遷洛
邑以是封諸侯受顯服大夫恐其志驕意滿怠于修
德故因美之而遂以戒勸也終南周之名山在扶風
武功縣東終南山西距鳳翔北距萬年長安左氏謂
之中南見昭四年條毛曰條稻孔氏引爾雅稻山榎
孫炎注爾雅引此詩有條有梅曰梅栴也郭璞曰似

杏實酢孫炎曰荊州曰梅楊州曰桄終南何有有條
有梅蘇氏謂襄公既為諸侯受服於周其人尊而說
之故曰終南則有草木以自衣被而成其深君子則
有服章以自嚴飾而成其尊此說是也鄭氏謂喻人
君有盛德乃宜有顯服猶山之木有大小也此之謂
勸戒其意謂無盛德則不宜矣鄭以上二句為勸戒
之故其言若此既以上二句為勸戒之則下二句為
美之其文不相貫紀毛氏曰基也謂山基也堂爾雅

曰畢堂牆郭璞云今終南山道名畢其邊若堂之牆
爾雅又曰山有堂郭璞曰山之崖室也然則堂者謂
山之道終南何有有紀有堂此言山有紀堂以成其
大也錦衣狐裘黻衣繡裳是襄公受命服於天子而
來也狐裘諸侯之服王藻曰君衣狐白裘錦衣以裼
之蓋以狐白皮為裘其上加錦衣使可裼也渥厚漬
也言其色如厚漬之丹而又澤也言其衣服容貌之
美如此宜其有人君之道也故曰其君也哉蓋言不

可以徒服其服也青黑相背謂之黻五色備謂之繡
將將佩玉聲也蓋言衣服佩玉之美如此宜其有人
君之道至于壽考而民不忘也故曰壽考不忘周設
司服之官自天子至于大夫之服皆有等差服天子
之服則有天子之德服諸侯之服則有諸侯之德服
大夫之服則有大夫之德苟徒服其服而無其德謂
之觀美可也豈先王制作之本意乎今襄公始為諸
侯而服諸侯之服宜其有諸侯之德此大夫所以勸

戒之也淇奥之詩曰會弁如星又曰猗重較兮此皆車服之美也然而衛武公之盛德至善民不能忘此所以服之無愧色襄公始為諸侯而其大夫能以此戒之可謂引其君以當道也

黃曰按秦本紀戎與申侯伐周殺幽王秦襄公將兵救周戰有功遂以兵送周平王平王封襄公為諸侯賜之以岐西之地曰戎無道奪我岐豐之地秦能攻逐戎即有其地襄公於是始國十二年伐戎至岐而

卒子文公立十六年以兵伐戎戎敗走遂收周餘民
而有其地至岐觀此則是襄公未得岐西而此詩言
能取周地何其不同也噫襄公之世已得周地而未
必能盡至文公十六年遂終有之也襄公始為諸侯
受服於周其人尊而說之故曰終南之山宜有條梅
之木紀堂之高以喻襄公之宜有錦衣狐裘黻衣繡
裳也故曰顏如渥丹其君也哉所以勉之以有君子
之服必有君子之容而無愧于為君也曰佩玉將將

壽考不忘所以勉之以有君子之容必有君子之德
而民之終不能忘也既有以稱之於前復有以勉之
於後秦人愛襄公之意深矣

黃鳥哀三良也國人刺穆公以人從死而作是詩也

交交黃鳥止于棘誰從穆公子車奄息維此奄息百夫之
特臨其穴惴惴其慄彼蒼者天殲我良人如可贖兮人
百其身交交黃鳥止于桑誰從穆公子車仲行維此仲
行百夫之防臨其穴惴惴其慄彼蒼者天殲我良人如

可贖兮人百其身交交黃鳥止于楚誰從穆公子車鍼
虎維此鍼虎百夫之禦臨其穴惴惴其慄彼蒼者天殲
我良人如可贖兮人百其身

李曰左傳秦伯任好卒以子車氏之三子奄息仲行
鍼虎為殉皆秦之良也國人哀之為之賦黃鳥君子
曰秦穆之不為盟主也宜哉死而棄民先王違世猶
詒之法而況奪之善人乎今縱無法以遺後嗣而收
其良以死難在上矣君子是以知秦之不復東征

也文公六年觀左氏君子之辭則詩人之刺穆公宜
矣以人從死者穆公命此三人以從已之死也揚子
或問信曰不食其言請人曰秦大夫鑿穆公之側說
者以謂三良嘗許穆公以殉死故鑿其壙之側以從
之而實其言夫信近于義言可復也三良復言而不
近於義安得為信揚子之說非也惟其穆公以三人
從死此其所以可哀也秦本紀曰穆公卒葬于雍從
死者百七十人而此言三良者不知當時所死甚多

惟此三人為良故獨哀之交交黃鳥止于棘交交毛
曰小貌桑扈曰交交桑扈鄭曰飛往來貌鄭氏為勝
當從之也言交交之黃鳥止于棘木之上而得其所
今三良不得其死是黃鳥之不如也鄭氏曰黃鳥止
于棘以求安已此固得之至以謂此棘若不安則移
是生外意也王氏曰黃鳥聲音顏色之美可愛而又
有仁心故以況三良夫黃鳥又安知有仁心楊龜山
已辨之矣又始曰止于棘中曰止于桑終曰止于楚

則與出自幽谷遷于喬木者異矣以哀三良所止不能進趨高義而終于死非其所也據詩之上章言三良不得其所不如黃鳥之止于棘為得其所也止于桑楚皆是此意便于押韻耳非有先後優劣之辨也誰從穆公而死乎乃子車氏之子其名奄息以死也惟此奄息之為人乃是百夫之中最為雄特今乃為從人之死秦人哀之故臨壙穴之上則惴惴然而戰慄蓋以百夫之特而埋于土中此其所以可懼也既

懼矣于是仰蒼天而訴之曰何為盡殺我善人也如其可以他人之身而代之則人雖有百身亦皆願贖之也夫人豈有百身之理哉愛之甚也百夫之防防猶當也言一人可以當百夫百夫之禦禦亦當也然奄息則曰百夫之特仲行則曰百夫之防鍼虎則曰百夫之禦亦是便于押韻尔仲尼曰始作俑者其無後乎為其象人而用之也始也以木為之其終必至於用人既至于用人則其終必至于善人其源流既

竭則其末流無所不至也此則作俑者其所以為無
後而詩人所以刺穆公也蘇氏曰三良之死穆公之
命也康公從其言而不改其亦異於魏顆矣此言得
之夫子之于父母東西南北惟命是從然父有不義
之命豈可從哉當其生也固當幾諫見志不從又當
起敬起孝悅而後諫惟欲置親于無過之地而已及
其死也雖有欲諫之志何所施哉故雖以三年無改
於父之道為孝而其不善者則改之惟恐其不及也

不然何以夫子曰從父之命又焉得為孝乎古之人
不特魏顆為然陳乾昔寢疾屬其兄弟而命子尊已
曰如我死必大為我棺使我二婢子夾我陳乾昔死
其子曰以殉死非正禮也況又同棺乎弗果殺蘇東
坡有云為人子之道事死如事生況於將死丁寧之
言棄而不用是必有大不忍者奪其情也其尊已之
謂乎此又非秦康公之所及也康公之孝似孝而非
孝陳尊已之孝似非孝而實孝詩人刺穆公蘇氏以

為康公之罪其亦以意逆志者也 黃講同

晨風刺康公也忘穆公之業始棄其賢臣焉

醵

子叔反

彼晨風鬱彼北林未見君子憂心欽欽如何如

何忘我實多山有苞櫟

盧荻反

隰有六駮

邦角反

未見君子

憂心靡樂

音洛

如何如何忘我實多山有苞棣

音梯

隰有樹

槩

音遂

未見君子憂心如醉如何如何忘我實多

李曰穆公所以成伯業者以其用賢臣康公繼其業棄賢臣而不用是忘父之業也爾雅曰晨風鷓舍人

曰晨風一名鷽鷽鷽鳥也郭氏以為鷽屬陸氏以鷽似鷽乃因風而飛說文曰旱天鷽一名晨風歟說文曰鷽飛貌北林孔氏曰據此詩所作見有此林也蓋言此林之木鬱然而茂盛故鷽飛而集亦猶穆公之好賢故未見君子則欽欽而憂惟恐其賢之不能至也今康公何為棄我乎欽欽爾雅曰憂也如何如何忘我實多言康公忘之甚也標爾雅曰標其實揀陸氏曰秦人謂柞標為標河內人或以為木蓼陸璣以

為此秦詩也宜從其方土以為柞櫟苞者叢生也六
駁毛氏以為如馬倨牙食虎豹是獸名也然上文言
山有苞櫟隰有六駁下文言山有苞棣隰有樹檉皆
是說草木不應于此獨以駁為獸也當從陸璣之說
駁馬梓榆也其樹皮青白駁犖遙視似駁馬故謂之
駁馬崔豹古今注云山中有葉似橡皮多蘚駁亦是
木名不可以為獸也六者王肅以謂據所見而言也
棣毛氏以為唐棣孔氏以為釋木有唐棣有棠棣毛

氏以為唐棣未詳聞也徐氏又謂棠棣徒見王氏謂其實可食遂以為棠棣然經文但言苞棣不言唐棣不可指名其名也棣陸璣曰一名赤羅一名山梨今謂之楊棣實如梨但小耳此言山之有草木所以為山之光輝亦猶國之有賢為國之光輝也未見君子憂心靡樂憂心如醉如何如何忘我實多以見其好賢之切也王氏以為北林之有晨風如人君之能黜除小人山有苞櫟山有苞棣謂能庇其國家隲有六

駁隰有樹樾謂能養其人民然此四者皆是木之材而王氏取喻其人之如何詩人本無此意不可以為說也

黃曰秦穆公不聽蹇叔之言喪師于殽其後悔過自誓而求其所謂一个臣斷斷猗無他技其心休休焉而有容者以保我子孫黎民則其所以求賢臣以保後世者切矣今康公忘穆公之業而至于棄其舊臣始之一字作序者所以深責之也故此詩言穆公求

賢而不已康公棄賢而不用其將何以自庇乎然三良之殉非穆公之罪而康公之罪也亦明矣

無衣刺用兵也秦人刺其君好攻戰亟欺冀反用兵而不

與民同欲焉

豈曰無衣與子同袍

蒲毛反

王于興師修我戈矛與子同

仇豈曰無衣與子同澤王于興師修我矛戟與子偕作

豈曰無衣與子同裳王于興師修我甲兵與子偕行

李曰秦人刺其君好攻戰亟用兵而不與民同欲秦

康公以文公七年立十二年卒按春秋文公七年晉人秦人戰于令狐十年秦伯伐晉又十二年晉人秦人戰于河曲十六年楚人秦人滅庸見于春秋傳者如此此足以見其好攻戰也惟其好戰不能與民同欲夫驅民以戰民亦有忘其死者今康公徒然好攻戰不能與民同欲此民之所以怨也豈曰無衣與子同袍袍者毛氏曰袍襦按王藻云纁為襦縕為袍孔氏以為純用新繇名為襦雜用舊絮名為袍是則襦

袍其名雖異其制度則一與子同澤澤者毛氏以為潤澤鄭氏以為澤褻衣近污垢說文曰澤袴也是其褻衣近污垢也論語注云褻衣袍澤也鄭說固勝於毛氏然終不如程氏以為澤者如今汗衫之類戈長六尺六寸矛長二丈戟長一丈六尺與子同仇仇方也作者起也行者往也此蓋思古之詩言古之人君與民非是以汝無衣之意與子同袍故也此乃與民同欲如此惟其與民同欲至于興師則修我戈矛與

子同伐仇方也與民同欲則民亦與君同欲也毛氏
謂仇為匹其說固不通非惟如此又謂同袍者興也
以興上與百姓同欲則百姓樂致其死然此非興也
鄭氏雖不以為興其說以謂君豈嘗曰汝無衣我與
汝共袍乎鄭氏之說雖勝於毛氏然謂君豈嘗曰汝
無衣則非也此詩與晉無衣同意晉無衣曰豈曰無
衣六兮不如子之衣安且燠兮非是無衣也但欲同
子之禮耳此詩所謂無衣亦非是無衣不過但欲與

民同袍耳說者以謂王于興師秦為諸侯之國安得稱王毛氏以謂天下有道則禮樂征伐自天子出鄭氏以謂王法興師王肅以謂疾其好攻戰不由王命王荊公以謂阻王命以厲民程氏謂以王道興師數說皆非也此是思古之詩指古之王者而言也孟子曰君行仁政斯民親其上死其長矣蓋言君子之於民能與之共安平則可與之共患難既不與之共安平則民豈肯與之同患難哉昔勾踐之伐吳越國之

民矜憐撫奄不啻若其親子弟及其伐吳國人皆以父勉其子兄勉其弟婦勉其夫曰孰是吾君也歟可無死乎是能與之同樂也固能與之同憂也衛則不然衛懿公好鶴鶴有乘軒者三百人及其將戰國人皆曰使鶴鶴實有祿位余焉能戰卒之為狄人所敗於滎澤衛幾于亡則不能與民同樂則豈能與民同憂哉今康公不能與民同欲欲民之從死必無是理況死者人之所重同袍同澤同裳者君之所輕以輕

與民而責其所重苟不施之而欲得其報豈有是理哉

黃曰秦為諸侯之國而曰王于興師者何也蓋此詩言秦君好攻戰而不與民同欲故詩人思古之王者能與民同安逸故能與民同憂患若平居不能恤民而臨難責其死節其將孰從乎孟子曰君行仁政斯民親其上死其長矣故周公東山之役至于三年之久而民忘其死勾踐伐吳國人皆父勉其子兄勉其

弟婦勉其夫曰孰是吾君也歟可無死乎蓋其能與
民同其好惡則民之視君猶吾身也視國猶吾家也
秦人亟用兵而不與民同欲其怨之也宜矣

李迂仲黃實夫毛詩集解卷十四